

NO. SOALAN: 3

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KEDUA
PARLIMEN KETIGA BELAS (2014)**

PERTANYAAN : LISAN

**DARIPADA : YB DATUK WIRA HAJI AHMAD BIN HAMZAH
(JASIN)**

TARIKH : 19 JUN 2014

SOALAN :

Datuk Wira Haji Ahmad bin Hamzah (Jasin) minta **PERDANA MENTERI** menyatakan apakah perancangan Kementerian dalam membangunkan amalan wakaf sebagai salah satu cabang ekonomi umat islam yang bermatlamatkan memberi manfaat kepada kesejahteraan ummah.

JAWAPAN: (Y.B. MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI)

Tuan Yang di-Pertua,

Saya mohon izin untuk menjawab pertanyaan ini serentak dengan pertanyaan yang dikemukakan oleh **Yang Berhormat Sabak Bernam, (nombor 46)** dan **Yang Berhormat Nibong Tebal (nombor 62)** pada **hari ini**, kerana menyentuh isu yang sama iaitu amalan berwakaf dan peranan Yayasan Waqaf Malaysia.

Tuan Yang di-Pertua,

Kerajaan menerusi Jabatan Wakaf, Zakat dan Haji (JAWHAR) dan Yayasan Wakaf Malaysia (YWM) sentiasa mengadakan program-program promosi bagi memberi kefahaman serta kesedaran meluas kepada masyarakat Islam mengenai amalan berwakaf. Kesedaran ini amat penting demi memastikan masyarakat dapat meningkatkan amalan wakaf mereka sama ada melalui hartanah dan juga wang tunai yang sekaligus bakal memperkayakan dana wakaf.

Di samping itu, kerjasama rapat bersama semua Majlis Agama Islam Negeri (MAIN) telah diwujudkan bagi memperkasakan amalan berwakaf di kalangan masyarakat Islam secara berterusan seperti mengadakan seminar wakaf, perkongsian pengalaman dengan negara-negara serantau, bengkel mengenai pembangunan ekonomi berasaskan wakaf seperti sistem sukuk dan sebagainya. Pendekatan Strategi Lautan Biru dalam membangunkan hartanah wakaf oleh Kerajaan Persekutuan bersama Majlis Agama Islam Negeri dalam pelbagai bidang sama ada ekonomi, kebajikan, kesihatan dan sebagainya juga akan diteruskan dalam Rancangan Malaysia Ke Sebelas (RMK ke-11).

Tuan Yang di-Pertua,

Sebagaimana Ahli Yang Berhormat sedia maklum, wakaf adalah termasuk dalam senarai bidang kuasa negeri mengikut peruntukan Butiran1, Senarai 2, Jadual Kesembilan, Perlembagaan Pesekutuan. Oleh

itu, Majlis Agama Islam Negeri (MAIN) merupakan **pemegang amanah tunggal** bagi semua wakaf di negeri masing-masing.

Penubuhan Jabatan Wakaf, Zakat dan Haji (JAWHAR) pada tahun 2004 dan Yayasan Waqaf Malaysia (YWM) pada tahun 2008 di peringkat persekutuan adalah bertujuan untuk **mengembeling dan menyelaraskan hal ehwal wakaf dan pemeraksanaan amalan wakaf di peringkat Persekutuan dan negeri-negeri di Malaysia.**

Di era sebelum penubuhan JAWHAR dan YWM, masyarakat Islam lebih tertumpu dan menjurus kepada amalan mewakafkan tanah dan harta benda. Tetapi kini, dengan nilai tanah yang semakin tinggi, maka masyarakat Islam menghadapi sedikit kesukaran dalam melaksanakan amalan wakaf kecuali mereka yang benar-benar mempunyai kekayaan dan kemampuan yang lebih untuk berwakaf. Sehubungan itu JAWHAR melalui YWM telah memperkenalkan alternatif yang membolehkan amalan berwakaf dapat dilaksanakan dengan lebih meluas meliputi semua peringkat kelompok masyarakat dengan memperkenalkan wakaf secara tunai dan melalui potongan gaji secara bulanan mengikut kemampuan.

Wakaf tunai ini apabila telah mencapai jumlah yang mencukupi, boleh digunakan untuk melaksanakan pelbagai pembangunan yang meliputi ekonomi, kebajikan, kesihatan dan pendidikan termasuklah pendidikan Islam. Dalam hubungan ini, JAWHAR dan YWM akan terus merangka program kerjasama dan penyelarasan dengan semua Majlis Agama Islam Negeri untuk mempertingkatkan amalan wakaf di kalangan masyarakat Islam di Malaysia.

Tuan Yang di-Pertua,

Selaras dengan Surat Ikatan Amanahnya, Yayasan Waqaf Malaysia berperanan untuk menggembelng sumber wakaf bagi memperkukuhkan sosio-ekonomi ummah. Di samping itu, penubuhan Yayasan Waqaf Malaysia juga adalah untuk mencapai lima matlamat teras, iaitu:

- i. mengumpul dana wakaf;
- ii. membangun dan memajukan harta wakaf;
- iii. melaksanakan program pelaburan;
- iv. melaksanakan program kebajikan dan sosial; dan
- v. melaksanakan program promosi dan penerbitan.

Sehingga kini, projek-projek pembangunan wakaf oleh Yayasan Waqaf Malaysia dan status pelaksanaannya adalah seperti berikut:

1. Projek Siap / Selesai / Beroperasi

Pembangunan 70 projek kecil berimpak besar (bersamaan 295 unit ruang niaga) di seluruh Negara yang dibangunkan terdiri daripada Bazar Wakaf Rakyat, Wakaf Mart dan Kios Cenderahati.

2. Projek Dalam Pembinaan / Pelaksanaan

- a. Pembangunan 11 projek sambungan (bersamaan 36 unit) Bazar Wakaf Rakyat dan Kios Cenderahati di negeri Kedah, Pulau Pinang, Selangor, Negeri Sembilan dan Terengganu.

- b. Pembangunan 10 projek (bersamaan 10 unit) Francais Wakaf Mart termasuk 1 unit ptototaip di Wilayah Persekutuan, Johor, Perlis, Perak, Melaka, Pahang, Terengganu, Kelantan dan Sabah.
- c. Pembinaan Akademi Latihan kepada anak-anak asnaf di negeri Kedah.

3. Pelaksanaan Kajian

Yayasan Waqaf Malaysia dengan kerjasama Unit Perancang Ekonomi (EPU) dan Jabatan Wakaf Zakat dan Haji (JAWHAR) sedang melaksanakan Kajian Pelan Induk Transformasi Pembangunan Hartanah Wakaf di Malaysia dan kini kajian tersebut dalam peringkat akhir untuk dimuktamadkan. Hasil kajian ini kelak akan dijadikan sebagai rujukan utama pihak Majlis Agama Islam Negeri, JAWHAR dan Yayasan Waqaf Malaysia dalam merencanakan pembangunan hartanah wakaf yang lestari di setiap negeri.

4. Pengurusan Akademi Kulinari Terengganu

Akademi Kulinari Terengganu (YWM-MAIDAM) yang telah dibangunkan di Marang, Terengganu ini menempatkan pelatih yang terdiri daripada anak-anak asnaf negeri Terengganu.

5. Pengurusan hotel-hotel wakaf

Yayasan Waqaf Malaysia juga menguruskan hotel-hotel wakaf yang telah dibangunkan oleh JAWHAR di bawah Rancangan Malaysia Kesembilan iaitu Hotel Pantai Puteri (JAWHAR-MAIM) di Melaka,

Hotel Seri Warisan (JAWHAR-MAIPk) di Perak dan Hotel Grand Puteri (JAWHAR-MAIDAM) di Terengganu.

Mengenai pelaksanaan **Pelan Induk Wakaf Korporat**, dimaklumkan bahawa kajian khas mengenai Pelan Induk Wakaf Korporat telah dipersetujui dilaksanakan oleh Kementerian Kewangan Malaysia. Perkara ini masih lagi berada di bawah tindakan Kementerian Kewangan Malaysia.

Sekian, terima kasih.

SENARAI PERTANYAAN YANG DIJAWAB SERENTAK

TARIKH : 19 JUN 2014 (NO. 46)

SOALAN :

Tuan Haji Mohd Fasih bin Haji Mohd Fakeh (Sabak Bernam) minta **PERDANA MENTERI** menyatakan setakat manakah amalan wakaf telah dilaksanakan di negara ini serta nyatakan langkah Kerajaan untuk menggalakkan amalan wakaf dalam membangunkan ekonomi dan pendidikan Islam untuk memberi manfaat kepada kesejahteraan ummah.

TARIKH : 19 JUN 2014 (NO. 62)

SOALAN :

Dato' Mansor bin Othman (Nibong Tebal) minta **PERDANA MENTERI** menyatakan secara terperinci peranan Yayasan Wakaf Malaysia yang ditubuhkan dalam tahun 2008 dan nyatakan apakah projek-projek pembangunan wakaf dan status perlaksanaannya sehingga kini.